



COMUNU DE BAULADU

PROVÌNTZIA DE ARISTANIS

CÒPIA

VERBALE DE DELIBERATZIONE DE SU CUSSÌGIU COMUNALE

Nùmeru 36 De su 30-11-2019.

OGETU:	CUNFERIMENTU DE SA TZITADINÀNTZIA ONORÀRIA A S'ONORÈVOLE ITALO ORTU E A SU PROFESSORE RAIMONDO ZUCCA.
---------------	--

S'annu **duamìgiadeghiannoe**, sa die **trinta** de su mese de **santandria** a is oras **6 de merie** in su Tzentu Tzìvicu Culturale de Bauladu, cunvocado dae su Sindigu cun avisos iscritos cunsinnados a norma de lege, s'est riunidu, in sessione **Istraordinària**, e in sèida **Pùblica** de sa prima cunvocatzione, su Cussìgiu Comunale, in is persones de is Signores:

CORRIGA DAVIDE	P	PES GIOVANNI BATTISTA	P
PALMAS CHIARA	P	PINTUS ANNA MARIA	P
DESSI' MARTA	P	SORU RITA	P
MATZUTZI ANNA	P	CONSOLO CARMINE	P
ZUCCA ELIA	P	ATZA MARTINA	P

Totale Cussigeris Presentes n. 10
Totale Cussigeris ausentes n. 0.

Partètzipat a sa sèida su SEGRETÀRIU COMUNALE Dott.ssa MANCOSU DONATELLA.

Su Sindigu CORRIGA DAVIDE assumet sa presidèntzia e constatadu legale su nùmeru de Is intervènnidos pro pòdere in manera vàlida deliberare, deccarat aberta sa sèida.

SU CUSSÌGIU COMUNALE

Cunsideradu chi su Cussìgiu Comunale de Bauladu cheret cunferire sa tzitadinàntzia onorària a s'Onorèvole Italo Ortu e a su Professore Raimondo Zucca;

Rilevadu chi:

- s'istitutu de sa "tzitadinàntzia onorària", mancarì non disciplinadu dae norma ispetzìfica nen subraordinada ne interna a su Comunu, costituitu unu reconnoschimentu onorificu detzisu de s'Ente pro chi, no essende iscritu in s'anagrafe rispetiva, si siat distintu in manera particolare in is diversos campos de is fainas umanas e apat instauradu relatziones durajolas e frutuosas cun sa colletividade Bauladesa;
- s'art. 87 de sa Costituzione Italiana, mentras atribuit a su Capu de s'Istadu su podere de cunferire is onorifitzèntzias tipicas de sa Repùbblica, a sa 114 reconnoschet is Comunos

comente a entes autònomos cun pròpios istatutos, poderes e funtziones, comente tzertamente cunferire reconnoschimentos non subrapostu a cussos regulamentados cun is normas istatales de atuatzione de sa Costitutzione;

- chi s'atribuzione de sa tzitadinàntzia onorària, contivigiende-si in s'interpretatzione de is sentimentos de una colletividade intrea, non podet àteru chi èssere torrada a portare intre is cumpetèntzias de s'Òrganu eletivu collegiale, est a nàrrere su Cussìgiu Comunale, puru no essende riconduzibile a perunu de is puntos elencados in s'art. 42 de su T.U.E.L.;
- chi, in manera materiale, sa "Tzitadinàntzia Onorària" est unu documentu, redatadu in formas adeguadas a su balore chi su Comunu ddi cheret assignare, de cunsignare in un'apòsita tzerimònia a sa persone chi nde benit onorada;

Intèndidu, in sa proposta depositada, s'interventu de su Sìndigu apòrridu in fatu:

"Porro unu cordiale saludu de benebènnida a is presentes in sala, in manera ispetziale a s'Onorèvole Italo Ortu, a su Professore Momo Zucca e a is rispetivas familias, a Don Fabio Marras, a Don Salvatore Brai, a Don Ernesto Zireddu, a is Sìndigos de Milis, Paule, Sabarussa e Tramatzza, a s'Assessora a s'Indùstria de sa Regione Sardigna, a is dirigentes de su Partidu Sardu de Atzione presentes fintzas in rapresentàntzia de su Presidente de sa Regione Autònoma de sa Sardigna, a is autoridades tziviles e militares chi ant acollidu s'invitu nostru e nos onorant de sa partetzipatzione issoro, a totus bois chi ais seberadu de cumpartzire cun nois custa appassionante assemblea de pòpulu.

Su Cussìgiu Comunale de Bauladu, cun sa tzerimònia de oe, pro mèdiu de su trastu de sa tzitadinàntzia onorària si cheret fàghere interprete de su pensamentu de sa comunidade e esprimere pubblicamente su sentimentu de istima chi is bauladesos bi tenent pro Italo Ortu e Momo Zucca, duas personalidades ligadas a forte a Bauladu chi, cun su remenu politicu e culturale issoro, ant contribuidu a dare lustru mannu a sa bidida.

Comente Amministratzione Comunale semus cuntentos de cunferire custu importante reconnoschimentu in antis de totu pro ddis nàrrere gràtzias. Gràtzias a bois àteros pro su traballu, gràtzias pro s'esèmpiu, gràtzias pro àere tentu artu s'onore, su nùmene e su prestìgiu de sa comunidade nostra.

* *

Italo Ortu, nàschidu a Bauladu in su 1926, giai Sìndigu de su 1964 a su 1984, tenet su mèritu de àere delineadu s'identidade de sa bidida: dae s'odonomastica bilingue, dedicada in manera intrea a s'istòria natzionale sarda - unu casu giai ùnicu in Sardigna - finas a s'introduzione - meda in antis chi is leges ddu cunsentirent - de s'usu de su sardu in sa fòrmula de su giuramentu e in su cussìgiu comunale, colende pro sa fundatzione – unu de is primos in Sardigna - de su Tzentru de Cultura Populare (Unla) in su 1957 e posca de sa biblioteca comunale. In is paràulas de s'istimadu archeòlogu Giovanni Lilliu, iscritas in su 1982 pro S'Unione Sarda in occasione de unu Prèmiu de poesia organizadu dae s'amministratzione comunale de Bauladu, agatamus s'idea de sardidade trateada dae is políticas de su Sìndigu Ortu. Lilliu iscritet: «Italo Ortu at reguladu sa bidida in is balores de su "connotu". Faeddat in sardu Bauladu: in su mòdulu pitzinnu de su paris urbanisticu, in su colore de ferru de is domos, in sa crèsia a cabanna simpre, in is iscritas de rugas e pratzas, in sa cara e in su limbàgiu de sa gente. Mancat feti chi dae sa ventana de "sa domu comunali" bentulet sa bandera de un'ideale Repùbblica Sarda». Paràulas chi nos faghent a beru orgogliosos de su logu in cale bivimus. Ma ancora in antis de devènnere Sìndigu, Italo Ortu est istadu intre is promotores – cun sutzessu – de sa torrada de s'autonomia comunale de Bauladu (chi fiat istada frazzione de Milis de su 1926 a su 1946). Est emozionante, pro custu, sentire contare de sa boghe sua s'episòdiu de s'addòbiu in su 1944 cun Emilio Lussu, fatu – apuntu – pro aviare su percursu pro s'autonomia comunale. Autonomia

chi Bauladu at torradu a tènnere duos annos a pustis, in su 1946, gràtzias a una mobilitazione pobulare de importu mannu. Pro tzitare un'àtera atzione de balore, mi faghet praghene ammentare su ruolu de Italo Ortu in s'istajone de su cooperativismu sotziale de sa biddu: in s'atòngiu de su 1944 at promòvidu sa costituzione de sa cooperativa de consumu intre traballadores agriculos; in su 1948 s'istitutzione de sa cooperativa agricula de massajos sena terra; in su 1962 de sa cooperativa artigiana e in su 1972 de sa cooperativa agricula locale chi a pustis est istadu mutidu a presidire. Gràtzias, Onorèvole Ortu.

* *

Momo Zucca, mancarì siat nàschidu in Aristanis in su 1954, frequentat Bauladu dae s'infàntzia e apartenet a una familia chi tenet is raighinas de su pròpiu àrbore genealògicu in sa biddu dae a su mancu chimbe generatziones. In Bauladu fiat nàschidu babu suu Antonio, nel 1910, nannai suu Raimondo nel 1873, bisaju suu Giovanni Daniele Francesco nel 1829, rebisaju suu Diego nel 1796, figiu de Anna Vittoria Zucca e discendente de Diego Zucca, cojuadu a Bauladu cun Maria Corrias in antis de su 1778. Ma, prus che totu, in Bauladu Momo Zucca at agatadu su pròpiu apentu a s'archeologia. In custu sentidu, est a beru emozionante a lèghere is paràulas suas in s'introduzione de sa monografia "Dae Vadum Latum a Bauladu. Istòria de una comunidade e de is paesàgios suos". Momo iscriet: «In Bauladu torro a bìdere is annos incantados de s'infàntzia mea, de is dominigas coladas in sa domo manna de mannoi meu e mannai mea Filomena Mura, maistra de is iscolas de Bauladu de su primu deghènniu de su sèculu coladu, cun is cortes, s'ortu finas a s'immensu (pro is ogros meos de pipiu) campu de su Muntronarzu, chi cunfinaiat cun sa Carlo Felice. Cussa domo fiat su nidu meu, cun is genitores meos, frade meu Gianfranco, is tzios e is tzias Maria, Bimbina e Silvia, Vincenzo e Margherita cun is figias Maria Rosaria, Giuseppina, Filomena. E sighit iscriende: tenia 10 annos in cussu tempus, cando apo incumentzadu is esploratziones archeològicas de su territòriu de Bauladu. In antis de totu Santa Barbara de Turre, cun su nuraghe complessu suo, su muru esternu, e sa domu de janas neolitica. E posca ancora su nuraghe Crabia, a suba de is ollastos, e su protonuraghe arcàicu Santa Vittoria. Tando, prus de chimbanta annos faghet, apo iscobertu chi, de mannu, dia àere fatu s'archeòlogu». E Momo, s'archeòlogu, no l'at fatu tantu pro fàghere. L'at fatu cunsighende traguados professionali notèvoles e resurtados de assolute annotu sientificu. Oe, pro mèritu de is dodas umanas e professionali suas, Momo Zucca est unu de is prus afirmados e istimados protagonistas in su campu de is benes culturales in Sardigna e, in modu ispetzificu, in àmbitu archeològicu. Dae su 1980 est Ispetore Archeòlogu in sa Soprintendenza Archeològica pro is Provintzias de Casteddu e Aristanis. Dae su 1992 est curadore de su Museu Antiquarium Arborensis de Aristanis. Dae su 1998 est dotzente in s'Università de Tàtari. Dae su 2010 est puru direttore de s'Iscola de Ispetzializazione in Benes Archeològicos ativadadu in sa sede universitària de Aristanis. Dirighet iscavos archeològicos in Sardigna e a s'èsteru, in Europa e in Àfrica, e est curadore de prus de 400 contributos tra articulos, libros e articulos subra rivistas subra àutos de cunvegnos natzionales e internatzionales. Una carriera professionale istraordinària, frutu de una passione chi at mòidu is primos passos suos a Bauladu. Gràtzias, Professore Zucca.

* *

Caru Onorèvole Ortu, Caru Professore Zucca, comente a bauladesos semus a beru orgolliosos e onorados de s'òpera bostra. Sa tzitadinàntzia onorària chi semus cuntentos de bos cunferire est su sigillu de is istraordinàrias esperièntzias bostras, est su reconnoschimentu de sa faina istravanada bostra amministrativa, polìtica, e culturale, sientifica e intelletuale. Dae oe, e pro semper, semus onorados de iscriere is nùmenes bostros in s'elencu de is tzitadinos prus illustres de sa comunidade nostra.

Omitidu s'achirimentu de pàreres de calesi siat natura no essende sa proposta, espressione de pura discrezionalità politica, assimilabile a calicunu de is provvedimenti chi los rechet e nemmancu a s'única tipologia de atos pro is chi est in manera esprimida esclùdida (de indiritzu);

CUNFERIT

Sa tzitadinàntzia onorària de su Comunu de Bauladu a s'Onorèvole Italo Ortu e a su Professore Raimondo Zucca.

De cunsignare a s'On. Ortu e a su Prof. Zucca sa pergamena chi atestat s'acontèssidu cunferimentu e is Craes de su Paisu.

Su presente verbale benit gasi sutascritu

Su Sìndigu
F.du DOTT. CORRIGA DAVIDE

Su SEGRETÀRIU COMUNALE
F.du Dott.ssa MANCOSU DONATELLA

ATESTADU DE PUBLICATZIONE

S'atestat chi còpia de sa deliberatzione benit publicada in su situ istituzionale de su Comunu, a disponimentu de su pùblichu, pro s'art. 32 comma 1 de sa L. 69 de su 18.06.2009, partinde dae su 12-12-19 pro nche abarrare bìndighi dies sighidas, e in manera cuntestuale comunicada a is Capos Grupu Consiliare.

Li, 12-12-19

Su SEGRETÀRIU COMUNALE
F.du Dott.ssa MANCOSU DONATELLA

Còpia cunforme a s'originale pro impreu amministrativu.

Li, 12-12-19

SU MISSU NOTIFICATORE
F.du Dott. Paolo Carta